

Libertads, pusseivladads e canera

Svenja Kaib

Per biaras personas munta viver en in marcau canera, stress e forsa era ina sort perdita d'identitad. La veta va pli spert ed ins ei mo pli ina persuna denter biaras.

Aschia hai jeu era s'imaginau la veta en in marcau avon ch'jeu hai ughegiu quei pass. Denton ha la veta el marcau purschiu a mi nundumbrevlas pusseivladads. Denter auter hai jeu saviu anflar ora tgi ch'jeu mezza sun insumma e tgei ch'jeu sun tut habla da contonscher. Jeu hai buca piars mia identitad, jeu hai creau ella.

Dad esser ina persuna denter biaras ha buca mo varts negativas. Esser ina persuna denter biaras porscha la pusseivladad d'ughegiar d'extrar dalla zona da confort e tenor miu meini ei quei la suletta pusseivladad da crescher sco persuna.

Jeu hai el decuors da mes dus onns ch'jeu vivel gia en in marcau grond empriu d'enconuscher aschi biaras personas e cun talas el medem mument novas historias e novas tenutas enviars tuts ils secturs dalla veta. Jeu hai saviu engrondir miu horizont personal e cun mintga di, cun mintga discuors e cun mintga scuntrada crescha el vinavon.

Denteren lasch jeu era encrescher per mia patria els cuolms. Denteren manca a mi la proximitad ch'exista el vitg nua che mintgin e mintgina enconuscha in l'auter e nua che tuts salidan in l'auter sin via. Denteren manca a mi la veta pacifica, il ruaus e la natira. Denton sch'jeu sun sin viseta ella patria dat quella proximitad il sentiment d'ina pintga perschon, nua che miu horizont seretrai cun mintga minuta che varga, il ruaus vegn aschi canerus ch'el disturba mei e jeu lasch encrescher per il marcau. A mi manca la glied e la canera.

Ruaus e natira ei buca mia via d'emplenir la batteria che porta mei tras il mintgadi. Igl ei la musica che cumpara ord il nuot las treis la damaun avon mia casa, igl ein ils discuors cun personas jastras ch'jeu vegnel probablamein mai pli a veser el decurs da mia veta e las caussas novas e nunenconuschantas che spetgan mei mintgadi.

Per entginas personas para quella moda da viver forsa nuncapeivla – era per mei avon ch'jeu sun sedecidida da viver en in marcau. Jeu hai denton buca saviu che viver el marcau era quei che muncava en mia veta.

Naturalmein sa ei dar midadas el futur nua ch'jeu hai puspei il desideri da viver silla tiara, el ruaus. Denton per il mument ei tut aschia sco ei ha dad esser e jeu sesentel arrivada en in liug nua ch'jeu sesentel dacasa, cuntenta, cumpleina e nua ch'jeu sai esser la versiun la pli autentica da mei mezza. In liug plein libertads e cun la pusseivladad dad ir per sushi cura ch'jeu hai queidas.